

四庫全書

集部

欽定四庫全書

集部  
謙齋文錄卷一

詳校官監察御史<sub>臣</sub>范衷

中書<sub>臣</sub>劉源溥覆勘

覆校官編修<sub>臣</sub>汪鏞

校對官中書<sub>臣</sub>吳裕德

謄錄舉人<sub>臣</sub>蔣傳馨

欽定四庫全書

集部六

謙齋文錄

別集類五 明

提要

臣等謹案謙齋文錄四卷明徐溥撰溥字時用宜興人景泰甲戌進士官至華蓋殿大學士謚文靖事迹具明史本傳溥於孝宗時在內閣十二年與劉健謝遷等協心輔治不立異同然於事有不可者侃侃力爭多所匡正

如諫止李華復官執奏不撰三清樂章因視  
朝漸晏上疏抗論並著謹直之節孝宗時朝  
廷清暇海內小康論者謂溥等襄贊之力為  
多今集中奏議尚在其指事陳言委曲懇至  
具見老成憂國之忱與隆萬以後訐激取名  
器爭立黨者詞氣迥殊蓋有明盛時士大夫  
風氣如是也至其他作則頗多應俗之文結  
體亦嫌平行蓋當時臺閣一派皆以春容和

雅相高流波漸染有莫知其然而然者王鏊  
震澤紀聞曰徐溥在翰林不以文學名及在  
內閣承劉吉恣威福報私怨之後一以安靜  
調和中外海內寧平行政不必出於已惟其  
是用人不必出於已惟其賢時稱休休有大  
臣之度云云是文章不如器量當時已有公  
評然有德之言終與塗飾字句者異是又不  
能不以其器量重其文章矣乾隆四十三年

三月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

謙齋文錄卷一

明 徐溥 撰

策

廷試策一道

臣對臣聞聖人之治本於道聖人之道本於心蓋心者萬化之原萬事之本也堯舜以是心而帝天下三王以是心而王天下惟其道本於心故聖人之道備惟其治

本於道故聖人之治隆故凡欲求聖人之治者不可不求其道欲求聖人之道者不可不求其心董仲舒所謂正心以正朝廷正朝廷以正百官正百官以正萬民正萬民以正四方即此意也欽惟皇帝陛下聰明睿足以有臨聖神文武自強不息紹祖德而誕膺天命應人心而中興邦家勤勵以親萬幾惇慎以弘萬化純孝之德播聞於宇宙之間仁厚之澤漸被於覆幬之下然猶慮負荷之艱而欲究弛張之善乃進臣等於廷降賜清



問臣有以知陛下是心即堯舜稽于衆好察邇言之心  
湯文用人惟已望道未見之盛心也其復隆古之至治  
而開萬世之太平端在於此顧臣愚昧何足以奉大對  
然敢不精白一心以對揚陛下之明命乎請因聖問所  
及而條陳之竊以家者一國之所視效國者天下之所  
取法而兵民又所以衛民生而固邦本者也陛下於齊  
家治國之道練兵安民之方皆已行之有其效矣茲猶  
欲聞至計何先切望何最臣願陛下正心以為家國兵

民之本而祖述於唐虞三代之迹正倫理篤恩義如堯之親睦九族道以德齊以禮如堯之平章百姓則九族既睦百姓昭明而家可齊國可治矣修車馬備器械而時其簡教如成周之治兵大閱有定制制田里薄賦歛以給其衣食如成周之分田制賦有常法則兵農相資守養相益而用可利生可厚矣若夫安上治民莫善於禮移風易俗莫善於樂而教化又所以復民性而正民德者也陛下於制禮作樂之方敷教弘化之道皆已行

之有其驗矣茲猶欲聞損益所宜隆替所係臣願陛下  
正心以為禮樂教化之原而憲章於唐虞三代之制典  
禮者如伯夷之夙夜惟寅直哉惟清典樂者如后夔之  
八音克諧無相奪倫則損益適中而禮備樂和矣惇典  
庸禮敬敷五教如唐虞之教民者以教其民弘敷五典  
式和民則如成周之化民者以化其民則教化興行而  
有隆無替矣治者亂所倚也雖當治定功成之日苟或  
頃刻敬畏之不存則亂亡由是而至必如書之予臨兆

民凜乎若朽索之馭六馬然後未亂之治可制臣願陛下  
下心唐虞三代制治之心兢兢焉戒敕天命而無時少  
怠無微少忽則皇圖可保如磐石之固矣安者危所伏  
雖當民康物阜之時苟或毫髮幾微之不察則危殆由  
此而生必如周之文王民已安矣而視之猶若有傷然  
後未危之邦可保臣願陛下下心唐虞三代保邦之心業  
業焉儆戒無虞而罔遊於逸罔淫於樂則宗社可保如  
泰山之安矣書曰平康正直強弗友剛克燮友柔克沉

潛剛克高明柔克詩曰不剛不柔敷政優優聖人撫世  
酬物因時制宜之良法也陛下誠如詩書所稱寬猛相  
制剛柔相濟則陽以舒之陰以斂之執其兩端而用其  
中於民矣書曰五百里綏服三百里揆文教二百里奮  
武衛文以治內武以治外詩曰薄伐玁狁城彼朔方聖  
人安夏攘夷慎固邊疆之要道也陛下誠如詩書所載  
內修文德外嚴武備使頃兵以守務耕以食高城堅壘  
而能却其侮於外矣君子用則進其國於昌明小人用

則降其國於幽暗人才賢否之由誠不可不知也陛下  
屢詔中外進賢退不肖矣茲猶欲聞賢否之由臣願陛  
下正心以為舉錯之公賢者必進而不肖者必退如孔  
子所謂舉直錯諸枉則奔競之途塞九德咸事野無遺  
賢矣賞必施於君子而後民勸刑必加於小人而後民  
威刑賞緩急之間誠不可不審也陛下申敕諸司嚴爵  
賞刑罰矣茲猶欲聞緩急之宜臣願陛下正心以為勸  
懲之本有罪者必刑有德者必賞如虞書所謂黜幽而

陟明則僥倖之心沮百工惟時庶績咸熙矣人事有得失而災祥不能無徵應也陛下誠省身修德敬天勤民於上羣臣咸盡忠竭力奉法修職於下則雨暘順而百穀登禍亂銷而千災殄矣時政有治忽夷狄不能無窺伺也陛下誠賤貨貴德愛民好士為之本諸侯咸摠誠宣威練兵鼓勇為之用則信義立而強梗化夷狄賓而蠻戎服矣凡此數者何莫而非本於陛下一心之運用乎夫心固為致治之本而古又為致治之法傳說所謂

事不師古以克永世匪說攸聞孟子所謂為高必因丘陵為下必因川澤為政必因先王之道是也若使徒稽諸古而不以施於事則為徒善不足以為政徒泥諸古而有不宜於今則為徒法不能以自行故必益之損之與時宜之如中庸所謂時措之宜乃可也陛下之策臣者臣既畧陳之矣臣於終篇竊有獻焉臣惟天地之所以能成歲功者以其常運之不已也帝王之所以能成治功者以其常德之不衰也陛下德配天地明同日月



誠又存持久之心秉有常之德則何所往而不宜哉書  
曰常厥德保厥位將見四三王而六五帝叅天地而贊  
化育歷數衍億萬斯年之久聲名施中國蠻貊之遙皆  
在於此尚何負荷之艱之足慮哉臣荷蒙教育之恩來  
應賓興之詔學不足以博古識不足以通今誤辱九重  
之清問獻以一得之愚思干冒天聰不勝怖懼臣謹對

奏章

題為救荒事

成化二十年九月初八日節該奏欽依著臣前往山西  
地方致祭西海等神為民祈福臣仰惟皇上之心視民  
惟恐有傷保民真如赤子之盛心也斯世斯民何其幸  
歟臣奉命惟謹於本月十九日起程二十八日到於山  
西布政司行仰本司委官督屬將銀兩鈔貫轉行該府  
州縣照依時價兩平收買品物備祭隨擇本年十月初  
十等日如儀沐浴齋戒躬率各該衙門官員人等陸續  
致祭中鎮霍山之神西海之神河瀆之神祭畢仍行本

布政司將給領收買過銀鈔品物數目徑自奏繳外臣  
自入山西太原府及抵蒲州盡其境界看得山西地方  
旱災於前霜傷於後太原一府汾州一州并所屬州縣  
今年秋成約有三四分熟此處人民今冬可過來春乏  
食平陽府迤北并潞遼沁三州所屬州縣今年秋成約  
有二三分熟此處人民冬初可過冬深乏食至如平陽  
府迤南所屬蒲解等州臨晉等縣及澤州所屬沁水等  
縣秋成全無即目人民已是採野菜剥樹皮度日扶老

攜幼遍於原野而流逋顛連塞於道路已嗷嗷待哺矣  
今冬加以寒凍所迫不知何以存活况聞山西地方連  
年薄收倉庫多空官司雖欲賑濟而莫知措手又兼邊  
事方殷饋餉惟急人民愈覺驚惶誠恐流移日衆嘯聚  
山林意外之虞又不能保其必無也洪惟皇上一德動  
天百神感格化災為祥行有日矣但此等民情皆臣目  
擊耳聞不敢隱默緣奉欽依救荒祭祀事理為此具本  
親齋謹具題知

奏為乞恩祭葬事

臣原籍直隸常州府宜興縣人由進士除授翰林院編修天順元年恭遇皇上毓德青宮先帝命臣兼司經局校書日侍講讀天順八年恭遇皇上嗣登大寶欽陞左春坊左庶子兼翰林院侍講充經筵講官歷陞禮部左侍郎欽依照舊經筵講書成化十九年九月三年考滿欽蒙兼翰林院學士給賜誥命臣妻李氏亦蒙進封三品淑人舉家仰戴聖恩昊天罔極雖粉骨碎身不能補

報於萬一也成化二十年八月臣妻李氏送男中書舍人徐元概回還原籍畢姻成化二十一年六月十四日不幸在家病故臣竊念立朝三十餘年夙夜在公未嘗得置一丘隴今妻喪於數千里之外子皆幼弱不能經理臣備員部佐又不敢以私情陳乞歸塋伏望皇上念臣侍從多年曾効犬馬微勞賜臣妻李氏祭塋臣舉家存歿不勝感戴天恩之至為此具本親齋謹具奏聞伏候敕音

奏為乞恩辭免陞用事

成化二十三年十月二十九日吏部節該奉欽依某官  
云云欽此欽遵臣聞命戰兢捫心惶懼謹具本辭免者  
切惟內閣乃朝廷宥密之地內相實國家輔弼之臣固  
惟贊萬事之機尤須極一時之選伏念臣學術荒疎才  
能謏薄偶與計偕遂登仕籍荷先帝之眷遇叨侍從之  
有年史館經帷愧乏論思之益儀曹選部徒懷鰥曠之  
憂況當陛下聖政惟新之始勵精圖治之時方求引退

之未遑豈意超遷之遽及雖遺簪舊物曲賜甄收顧駕馬疲力實難驅策如蒙伏望聖慈俯矜愚悃亟寢新命俾守舊官庶得安於常分以免罪愆臣不勝激切俟命之至為此具本親齎謹具奏聞伏候敕旨

奏為乞恩辭免陞職事

成化二十三年十一月二十日吏部節該欽奉敕侍郎徐某陞禮部尚書兼文淵閣大學士欽此欽遵臣聞命驚惶省躬戰悚伏以學士乃論思之職而居內署者最



為清近尚書實股肱之臣而得兼職者尤為寵榮苟非  
其人曷稱斯任竊念臣性質愚樸學術空疎本一介之  
寒微荷三朝之眷遇位祿既厚常懷曠職之憂年力向  
衰徒有報君之志茲者伏遇大明既照聖政惟新臣以  
非才宜居擯列而乃首蒙簡拔俾預政機顧辭讓之靡  
獲奚負荷之敢當豈期曾未踰月之久復叨進秩之榮  
雖天地大德務極其包荒而犬馬微誠不勝其懇切如  
蒙伏望聖慈俯垂矜察特乞追寢新命容臣照舊供職

庶竭駑鈍少答恩私臣無任激切懇訴之至為此具本親齋謹具奏聞伏候敕旨

奏為乞恩辭免加陞事

近因纂修憲宗純皇帝實錄成書謹已進呈伏蒙皇上以臣曾充總裁官特敕吏部加臣太子少保兼武英殿大學士聞命兢惕莫知所從竊惟臣遭遇盛世獲以科第發身歷事累朝幾四十年於此方皇上龍飛之初復被擢置內閣叅預機務又及四年任重望輕位高才短無

補於世每愧於心況自近年精力愈耗疾病交侵特以受恩既深未忍求退因循度日食祿苟安茲者紀述成書固朝廷之盛典而奔走從事乃臣子之微勞方懼踈略不文之譏敢萌優渥踰涯之望豈期寵命俯及凡庸蓋宮保為崇高之階殿學實清要之秩欲稱斯任宜得其人如臣之愚安敢當此雖循故事難冒新恩伏望聖明察臣愚衷追寢前命俾居原職公議始慙私心少安顧臣衰體尚可支持更當竭犬馬之力以圖報萬一於

他日也臣不勝激切懇祈之至為此具本親齋謹具奏  
聞伏候敕旨

題為詰敕事

臣某等切惟文職詰敕乃朝廷之重典原係內閣掌行  
近年以來內外各衙門官貲漸多比之國初不止加倍  
名職條例人各不同臣等叅預機務事體繁重不暇致  
詳別無專官管理前後委積動至數百道每誤進呈訖  
類送中書舍人書寫吏部奏請關給一年僅得一次多

亦不過二次各官應給誥敕者多因父母年老日夜懸望欲沾一命不能猝得或朝不保暮遺恨終身誠為未便臣等看得正統年間王直王英俱係侍郎兼學士職事在於內閣專掌誥敕今推得某官歷任年深合無量陞一職令在內閣專管誥敕庶委任專一事不稽誤未敢擅便謹題請旨

奏為乞恩休致事

臣惟古者大臣以論道經邦燮理陰陽為職故凡陰陽

不和雨暘愆若皆大臣不職所致載在周書誠非虛語  
臣本凡庸誤蒙皇上拔置內閣叅預機務自顧不堪夙  
夜憂愧屢欲引退自以受恩既深未能圖報萬一心竊  
不安茲者各處水旱相仍餓莩滿道已不忍聞况有星  
墜地震之異至於雨土飛蝗又所親見災變若此臣實  
不能修職所致當此之時更不引退豈惟負朝廷之深  
恩亦難免士林之清議而天意終無可回之時矣考之  
前代或遇災變策免大臣已有故事又豈始於今日乎

且臣非但於理當去况稟受素弱兼之近年衰病日侵  
齒牙脫落眼目昏花又舊患腿膝濕病或時舉發則步  
履艱苦實難支持伏望皇上鑒臣實情非由矯飾放歸  
田里以盡餘年庶合周書官不必備之意然後別選賢  
才以居其位則臣且免妨賢病國之譏矣更望皇上側  
身修行如古人之弭災凡諸可行可罷之事斷自聖心率  
由祖訓則不獨天意可回且將轉災為祥而益隆億萬  
年太平之治也臣不勝惓惓懇祈之至

奏為乞恩請命保守義田事

伏念臣居直隸常州府宜興縣某里本族見在計若干房耕讀之外無他藝業生息日益貲產日分富少貧多勢莫能一其間嫁娶過時喪葬缺禮老而失養幼而失教者往往有之是雖服有遠近皆吾祖宗一體之所分也休戚所關不唯不忍忘亦有不能已者臣先父臣某每與臣言及此輒慨然長歎蓋嘗修祠堂以申合族之義廣墳山以供掃墓之需顧於周恤之道尚有未備用



是欲倣宋臣范仲淹義田故事量撥本房地畝贍給宗族之人以臣有職於朝特屬臣弟臣某經營其事不幸臣父臣弟相繼淪謝前議中止今臣累蒙先帝皇上簡拔承乏今官祿賜所入實有餘裕臣上思聖恩下念先訓勉終前議以酬夙懷乃於前年令臣男某撥地八百畝為義田歲收租稅除辦納國賦外另為掌管專一贍給前項宗族仍以仲淹舊規斟酌損益立為條約揭於祠堂期與墳山世傳不墜使徐氏子孫永永沾沐餘澤

庶幾區區之志少盡萬一而往復因循倏忽三載近者  
某始將撥過義田數目私冊并所擬條約封寄到臣臣  
切以茲事之成實維皇上優渥之賜不然則臣身臣家  
僅能自供奚及人哉況臣才猷德學遠愧仲淹而誤承  
寵遇乃特過之臣雖至愚豈不知感是以不敢以私自  
諱謹昧死上聞臣又惟義田之置雖臣家事若條約不  
關於司徒數目不籍於郡邑誠恐他日子孫或視為度  
外則隣有所侵而不知或認為分內則族有訟而莫止

分者肆強取之奸主者滋吝出之弊勢有必然所宜深  
慮伏望皇上鑒臣私情乞下戶部將臣後開義田數目  
私冊查看明白用印鈐記劄發臣本管府縣當官收架  
仍給一本與臣家存照永為遵守及行前項衙門若有  
他人侵占即與斷理其本族子孫妄欲爭分及各項違  
沮條約情弊即與禁治將見家法之存永賴國法而臣  
祖宗九原之慰子孫百世之休皆皇上今日之賜也臣  
不勝懇款祈請之至

題前日欽蒙發下揭帖一紙內閣欽天監致仕

監正李華令臣等擬旨着復職管事

臣等看得李華係傳奉官禮部叅奏行事乖繆致仕況已年老今一旦無上事忽然傳出著復職管事未免驚駭衆聽且皇上登極以來凡百除授陞遷俱是合於衙門題奏請旨未有自內傳出者今又輒開其端誠恐奔競干請之徒因而紛然復起後來難以止塞其於治道不無有損若李華果於選擇昌國公張巖墓地與有勞

力亦當待工完之日量與賞賜為宜況本監見有監正  
吳昊掌印一衙門而設兩正官亦為繁冗臣等叨承朝  
廷委任一事不敢阿從易曰君子作事謀始蓋凡事謀  
於其始則易為力倖門一開則引例希求者無所不至  
矣臣等愚見如此伏乞聖明採納不勝幸甚

奏為乞恩休致事

臣聞古者大夫七十而致仕夫既委質而出又乞身而  
歸者豈勤始怠終厭勞喜佚之謂哉蓋七十之時精神

耗散則見事每遲筋力衰憊則承事多慢雖欲勉強自效有不可得者於此而不知止足以致於妨政廢事則求以報國而寔所以病國矣臣由景泰五年進士歷官翰林編修春坊庶子詹事學士太常卿吏禮二部侍郎累荷英宗睿皇帝憲宗純皇帝厚恩洊擢清要三十餘年及皇帝御極之初簡致內閣叅預機務進位尚書加太子太傅以至少傅又十餘年犬馬之齒已七十矣緣臣性質愚鈍才識踈淺力小任重本非所堪而夙夜驅

策不遑飲食幸能粗了所事苟免過愆今年老病忽侵  
頭目眩暈腰膝疼痛步履艱難拜起不便較諸往時日  
甚一日若復貪戀寵榮不自引退非惟有妨賢路抑恐  
有孤重寄其為罪戾何可勝言敢瀝寸衷上千天聽伏  
望聖明鑒察特賜優容使得全歸故里少延殘年以歌  
詠太平之盛則皇上始終之恩當沒齒不忘矣臣不勝  
激切懇祈之至

奏為乞恩罷歸以弭災異事

仰惟皇上頃因星變敕諭羣臣修舉政事引咎責躬不  
遑寧處聖心謙冲與古之明君遇災修德者同一揆也  
臣竊謂今之政事皆羣臣之所奉行則今之災異亦羣  
臣之所感召然羣臣中如入內閣者自先朝至今俱令  
叅預機務故凡政事缺失軍民困苦責望必歸其罪尤  
重而臣素無學術不諳政體誤蒙聖恩擢廁其列碌碌  
度日已踰三年上則無以輔導不能增益乎聖德下則  
無以建明不能安利乎生民叨享厚祿於心有愧竊欲



引退已非一日特以聖恩深重勉圖報效因循至今今則臣年益老筋力衰憊加以腿膝疼痛頭目昏眩諸病交作難以支持雖無災異亦當引退況此天意示警之時尚復貪戀不去其為無恥甚矣且以災異策勉大臣前代已有故事亦非始於今日伏望皇上察臣愚衷非由矯飾特賜俞音罷歸田里俾無久妨賢路以清聖政以消天譴幸甚臣不勝惓惓懇切之至

奏為乞恩休致事

近該臣具本陳情再乞休致欽奉聖旨云云欽此臣聞命之餘無以自處展轉思惟感懼愈重竊念君臣之義實同父子之親苟非甚不得已孰敢言私以違上命況如臣者仰賴寵榮久叨任使揆之於義尤當委身圖報雖有疾病其何敢辭但臣素稟薄弱又當年老元氣一虧百證俱作臣前所陳腰腹疼痛腿膝酸麻眼目昏翳蓋其大者自此之外所苦尚多態狀百端不能具述此皆元氣向衰之故縱善調理僅不即死非如少壯之人

偶有所感可以旬月俟其平復也是則臣之一身已成  
痼疾已為棄人決不能趨朝行禮決不能入閣供事徒  
使天下之人以為聖明過念老臣而久妨賢路夫亦何  
取於臣哉臣蒙皇上天地之恩至矣極矣凡臣之所能  
為者敢不自效臣今所請非敢以微軀自愛非敢以引  
遠自高非敢以不才自避蓋恩重於身若斯三者皆為  
得已今視無所見跬步之間難於自致則身且不能保  
矣而況有事於禁近之地乎此臣所謂甚不得已者也伏

望皇上憐臣病勢如此察臣衷情如此早賜俞允容臣  
生還鄉里臣當仰遵聖諭善加調理苟延一日是皇上  
一日之恩也苟延一歲是皇上一歲之恩也即有不虞  
死且不朽矣臣無任惶恐迫切之至為此具本

奏為乞恩休致事

臣昨以齒及七十兼有疾病不能事事具疏陳情懇乞  
休致竊伏聽命未蒙俞允乃賜勉留仍假優禮聖恩於  
臣可謂極厚矣顧臣之所請非謂年力至此援例一辭

以應故事而已臣愚自知臣實有不得已者臣自數十年來積有痰濕之疾甚為所苦蓋痰氣發則胃膈飽滿嘔吐不止濕氣發則腿足酸楚呻吟不勝一歲之間一月之內凡有幾發發必服藥數日始得平復頃以年力未甚衰憊未至狼狽然一發之後元氣一損屢發屢損至於今茲其發愈數其損愈甚加以飲食衣服稍至失節天時六氣乘間以入新感舊患合而為一徐行安坐尚或失措豈有精神心思上贊機務臣不足恤如誤事

何臣之所請實出於此不然臣雖愚敢上忘國恩苟圖自全也哉再念臣學術空疎才識寡陋誤蒙知遇簡任過分極知叨冒未敢乞辭止緣年力尚可支持庶幾圖報萬一今年衰力憊疾病侵凌雖有區區犬馬之心何以自盡徘徊偃蹇妨塞賢路此臣前所謂欲報國而反病國者也況風雨寒暑免朝之典此宜施於碩德重望之人如臣愚者不惟不敢當受抑恐寵數日隆則慙愧日深慙愧日深則疾病日益亦何補於國哉夫人臣事

君進退惟義語默以誠臣愚平生用此自誓向使臣無  
諸種疾病固不敢以任使弗效欲求引避若臣能少有  
裨益亦不敢以疾病之故使其身圖今者外觀內省進  
瞻退思宥密之地有臣無臣不為輕重在臣之身一去  
一留實係軀命是以再瀝肝膽上瀆天聰伏望皇上以  
義處臣以誠體臣容臣退歸田里歌詠太平則陛下之  
容臣乃全臣終始臣之自全實尚賢以圖報於陛下也  
惟哀矜臣愚早賜俞允臣不勝感幸之至

奏為乞恩休致事

近該臣奏乞休致節奉聖旨宜留心勉進藥餌用副眷懷所辭不允欽此臣伏枕聞命感懼交集雖知年當衰邁病已積成不能遽療然仰懷天地之恩未敢自弃乃益請醫檢方製藥朝夕服飲不憚瞑眩以圖幸全以答明命自聞命至今又踰一月矣腿膝之酸麻加劇腰腹之疼痛加數眼目之昏翳加重故寤寐呻吟之餘每以上負聖恩不能終報無可奈何念惟速退以尚賢能是



亦圖報之道不免再陳懇乞俞旨蓋臣自入官以來荐  
歷清要四十五年至於供事內閣亦十餘載榮光寵數  
凡人臣之所難得者臣皆得之臣雖至愚豈不知委質  
之義而固求一退以自便適哉顧臣之事君必資耳目  
手足而後可以有為臣足既病於寒濕目又病於熱邪  
二體交病雖有才猷亦難自效況臣之愚復何所為且  
皇上留臣一日竊一日之祿負一日之責內慚外悚病  
將愈深其於皇上求舊之懷恐無以仰副萬一也臣之

再陳實非得已伏望皇上鑒臣愚衷憫臣老病容令退休則臣未死之年實惟皇上之賜臣與臣之子孫墮首捐軀不足為報矣瞻望闕廷無任懇切願望之至

奏為謝恩事

臣昨者奏乞休致欽蒙聖旨云云欽此臣負疾請命已及三月忽得俞旨感激無已雖在床褥亦竊瞻望拜稽祝天稱壽顧不能進造廷陛面致一辭用是慙然實悚實懼竊念臣才質庸下學術荒疎識雖通今行多愧古

而遭際明時忝廁科甲一命為編修兼校書再命為庶  
子兼侍講三命為少詹事四命為太常卿五命為禮部  
侍郎六命為吏部侍郎俱兼翰林學士居位因循無所  
裨益日分遲朽久甘退休伏遇皇上登極之初特拔臣  
於具寮俾入內閣供事臣之知遇誠有出於尋常萬萬  
者既而恩榮寵數日加一日十二年之間四進階勲名  
列師傅兩受誥命光賁祖宗兼學士歷三殿之崇領尚  
書躋六卿之長月賜歲頒晨叅晝接駢蕃隆渥不能具

悉臣之榮幸又有出於尋常萬萬者臣雖至愚亦思少竭駑材以圖報稱但任既踰分力每違心老境侵尋疾病繼作臣於去歲常以年滿七十具本求退比蒙聖恩留臣供事且有免朝之旨臣勉強就列循至今年有此痼疾乃敢懇請乞賜餘生得遂所圖已為萬幸復荷聖恩念臣微勞重之以倚任之褒申之以調理之諭至於再三纔得俞允不惟降敕以示優崇而又給驛以行差官以送代勞有夫助養有米且念及臣子錫之以官蓋

皇上篤求舊之誠惇勸忠之義以至如此顧臣之愚不足  
以當之也臣今老矣何以圖報於皇上哉自臣而後  
子子孫孫或為儒以仕或為農以耕庶幾樂育清化以  
繼續臣心於無窮而皇上求舊勸忠之意天下之人奮  
發興起以副明德者固有在矣非臣之所能報也臣感  
恩深切不知所云無任慙悚惶懼之至緣係謝恩事理  
為此具本令義男徐某抱齋謹奏聞

奉命撰三清樂章奏

臣等切惟天子祭天地夫天至尊無對故禮以少為貴  
祭不過南郊時不過孟春特不過牲牛漢祀五帝儒者  
非之況三清乃邪妄之說謂一天之上有三大帝乃以  
李聃居其一是以人鬼列於天神非禮也至於郊祀樂  
章皇祖舊製今所傳樂章雖載永樂大典是書博采弗  
精不可以黷禮臣等誦習儒書若邪說俚曲尤所不習  
且初設文淵閣命學士居之者實欲其謀議政事講論  
經史培養本源闢正闕失非欲其阿諛順旨以取容悅

也為此具本奏聞

奏為視朝事

伏覩陛下臨御之初講學修德敬天勤民無所不至天下之人皆以為堯舜之治可指日而俟也近年以來視朝甚遲或日高數丈殊非美事臣等已嘗屢言不敢瀆論內閣奏事舊制每日二次若有緊急事情不拘時奏聞今止一次遂以為常批答之出動經累日各衙門題奏本或稽留數月或竟不發出事致壅滯不得即行且

本朝列聖自洪武以至天順年時常面召儒臣諮議政事今朝參之外不得一望天顏所以通達下情者惟在章奏又不以時斷決其於政體實為有礙至於經筵日講所以明義理是非之端陳古今治亂之迹成就君德裨益治道惟在於此今每歲進講不過數日去年春夏日講止得三次秋冬經筵止得一次較之初政似有不  
同臣等竊聞人君之心必有所繫不繫於此必繫於彼正士既疎則邪說得以乘間而入向來頗聞有以修齋



設醮燒丹煉藥之說進者夫齋醮之事乃異端惑世求利之術聖王之所必禁宋徽宗崇信道流科儀符錄一時最盛及金兵圍城方士郭京猶誑稱作法卒使乘輿播遷社稷失守求福未得反以召禍今內庭禁地修建不時賞賚無算黜退道官復陞真人賜以玉帶恩寵服色過於公卿遠近傳聞無不駭異至若燒煉之事其害尤慘蓋金石之藥性多酷烈一入肝腑為禍百端唐憲宗藥發致疾遂殞其身雖杖殺柳泌何救於事惟漢武

帝始雖迷惑終知悔悟謂天下仙人豈有盡妖妄耳於是文成五利之徒相繼誅死故雖海內虛耗亦以壽終今龍虎山上清宮神樂觀祖師殿及內府番經殿皆焚燬無遺神如有靈何不自保天厭其偽亦已甚明況依方而煉計日而待所成者何丹所驗者何藥如其無效則聖明所照亦可以洞悟矣若親儒臣明正道行善政自足以感召嘉祥培益聖壽永享和平之福何假於彼異端之說哉且自古奸臣佞人蠱惑君心以自肆其欲

者必以太平無事為言禍患一來悔之何及唐相李絳  
有言憂先於事可以無憂事至而憂無益於事今承平  
日久溺於宴安自目前觀之似乎無事然工役繁興科  
派重疊財穀耗竭兵馬罷散生民困窮日甚一日愁歎  
之聲上干和氣熒惑失度太陽無光天鳴地震草木妖  
異四方奏報殆無虛月將然之患誠為可憂陛下深居  
九重言路之官皆畏罪隱默臣等若復不言誰肯為陛  
下言者伏願陛下嚴早朝之節復奏事之期勤講學之

功優接下之禮遠奸佞之人斥誣罔之說則聖德日新  
聖政日理億萬年太平之業可保無虞矣為此具本奏  
聞

奏為纂修事

臣等奉敕纂修書籍必須斷自宸衷賜以名目有司曉  
然知聖意所在纂修者有所依據承行者有所遵奉為  
此具本奏聞

奏為考選庶吉士事

據給事中涂旦建議欲選新進士改庶吉士入翰林院  
讀書惟庶吉士之選自永樂二十年以來或間科一選  
或連科累選或數科一選或合三科同選初無定限每  
科選用或內閣自選或禮部選送或會吏部同選或限  
年歲或拘地方或採譽望或就廷試卷中查取或別出  
題出試亦無定制自古帝王皆以文章關乎氣運而儲  
才於館閣以教養之本朝所以儲養之者自及第進士  
之外止有庶吉士一途凡華國之文與輔世之佐咸有

賴於斯然而或選或否則有才未必皆選而所選者又未必皆才若更拘於地方年歲則是已成之才或棄而不用而所教者或未必皆有成請自今以後立為定制一次一開一次選用待新進士分撥各衙門辦事之後偶其中有志學古者各錄其平日所作文字如論策詩賦序記之類限十五篇以上於一月之內赴禮部呈獻禮部閱試訖編號封送翰林院考訂其中詞藻文理有可取者按號行取本部仍將各人試卷記號糊名封送

照例於東閣前出題考試其所試之卷與所授之文相  
稱即收以預選若其詞意鈎棘而詭僻者不在取例中  
間有年二十五以下果有過人資質雖無宿構文字能  
於此一月之間有新作五篇以上亦許投試若果筆路  
頗通其學可進亦在備選之數每科不必多選所選不  
過二十人每選不必多留所留不過三五輩如此則所  
選者多是已成之才有所論撰便堪供事將來成就必  
有足賴者如是則預列者無徇私之弊不預者息造言

之謗臣等皆出自此途引進後賢儲之館閣以報國厚恩乃其職也為此具本奏聞

詩

題尚朴翁卷

太古云已遠斯人獨返淳有書閒白日無夢落紅塵鳥跡平沙晚花香小徑春澹然保終始不愧葛天民

菊莊為蔣翁題

有地惟栽菊無心種百花泉香儼甘谷徑僻是陶家但



得客常醉何妨酒屢賒物情與人意相對樂年華

終慕為王廷瑞題

椿萱凋謝久孤子獨遐思宰木烏啼夜空庭月落時尋  
常來夢寐彷彿見容儀無限傷心事相看淚亦隨

風木卷為侍御父題

贊政居蓮幕承恩進柏臺竟違三釜養徒抱百年哀古  
樹庭中植涼風天際來飄蕭殊未歇虛枕夢初回

歸樂堂

十年遊上國此日賦歸歟倦却風塵路來尋水竹居山  
行春載酒門掩晝翻書薄暮投林鳥相看意自如

贈華陽處士孫以言

句曲幽棲處分明小洞天浮生空富貴幻迹自神仙梅  
月閒中詠松雲醉後眠何時尋舊約重泛剡溪船

桃花衆禽為林教諭題

碧桃在天上緋桃巖谷中巖谷深且僻天天自春風乃  
知造化恩一一皆至公衆鳥且有託飛集左右同虞羅

既無恙飲咏聊可充人生亦如斯出處當時雍苟或失  
其所寧不感吾衷

朴菴為張原哲題

隱居遠城市蹤迹謝紛華有室能容膝無園可種花養  
親惟菽水留客只茶瓜坐榻全無足歌簷欲墮牙借書  
尋舊友賒酒仗隣家清世真堪樂豐年亦可誇葱湯并  
麥飢一飽卧煙霞

湖山遊樂卷為薛楹題

金匱山房集 卷一  
公子南遊日湖山興最長鳳臺芳草綠鷺渚落花香銀  
甲來紅袖瑤琴出錦囊煙霞登碧巖風月泛滄浪對景  
開詩卷追歡送酒觴五雲天只尺回首思茫茫

送錫山高貢士

九龍鍾秀色萬卷富才名觀國酬初志還家喜此行平  
蕪煙渺渺喬木鳥嚶嚶望裏雲山近吟邊野鶴迎儒流  
重經濟文運屬昇平再養如雲翮騫騰九萬程

送石繼賢還江陰

萬石推先世多才邁等倫劍光橫白日文采照青春喜  
作橋門客仍懷梓里人綵衣雖可樂黃卷亦宜親瞻眺  
君山表行歌驥水濱他年拜華秩鳴佩侍楓宸

送魯揮使還雲南

虎拜覲龍顏匆匆又遠還寸心思補報萬里任間關歲  
晏雲連塞天寒雪滿山柳營千騎簇天闕五花頒韜略  
心方切琴尊興未慳青年立奇績節序易闌珊

送憲副張來鳳之浙

憲體從來重如君更老成胸涵滄海濶心與玉壺清峻  
擢新承寵高科舊擅名行行南浦恨戀戀曲江情雪路  
雙旌發雲霄一劍橫到官吟思好臺柏對春情

送王判官之廣平

廣平今大郡別駕共稱賢書最銓曹裏承恩禁陛前天  
香凝宦節山色上離筵送酒青雲客揮毫紫閣仙春光  
殊冉冉別恨各懸懸拭目重來日勲階不次遷

送顏性之依親南還

楚楚賢關士，翻然乞假歸。思親驚節序，飛夢繞庭幃。  
未解通金籍，先容舞綵衣。騫騰終有待，報答願無違。  
寒雪孤松操，春陽寸草暉。停雲千里外，莫遣信音稀。

送謝伯儀守開州

賢哉三謝後，分命守開州。卓犖才聲重，循良政績優。  
論交當早歲，惜別已深秋。五馬馳官道，雙旌指驛樓。  
由來今刺史，即是古諸侯。屈指三霜後，榮遷拜冕旒。

送航上人歸宜興并感舊

憶昔青蓮宇相依玉帶山禪心自消歇塵跡幸躋攀錫  
向峰頭卓杯浮日下還隔溪煙樹綠滿地雨花斑坐久  
渾忘世吟看共解顏因思京國別回首五雲間

送龍克溫還金陵時携姪襲百戶職

金陵有佳士小阮共之京閥閱承華胄詩書擅令名論  
交酬夙願叙別動深情草色連天遠槐陰過雨清三秋  
及流火一月計歸程千里遙迎睇征鴻好寄聲

送嚴宗源提督學政



昭代崇儒教于焉敕憲臣斯文資振作吾道屬經綸  
肅政推烏府清光覲紫宸睽違當此日良晤卜初旬握手  
情無限同年意更親槐陰燕市上草色潞河濱去去巡  
南甸懸懸仰北辰明當膺峻擢人物荷陶甄

送朱維吉還江陰

落落澄川老青雲早乞身有懷尋水石無夢動星辰  
祖席燕臺下歸舫潞水濱已能酬壯節何必問通津  
杖履高軒晚鶯花別墅春塵途試回首多少未歸人

送張行人次韻

天騎發深春官途不動塵重臨分手處俱是宦遊人芳  
草情何遠流鶯語更新停雲千里外幾度憶清真

送唐醫官還茗溪

西風來白鴈有客欲南旋吟詠真吾事勤勞獨汝賢賞  
花燕市酒載月米家船他日茗溪道相尋水竹邊

送黎知州還任

偉矣黃堂客皇都報政還年光何荏苒世事亦間關五

馬雲邊道雙旌雪後山董生才望重指日遙鶴班

送張用光通判建昌

盱江風俗淳佐郡鷺袍新絃誦千家月桑麻到處春  
訟庭公牘簡齋閣賦詩頻會見旌賢日綸音出紫宸

送鄒別駕之鳳陽

雄才試名郡歷歷聞政聲北闕既拜命南風搖雙旌  
濠梁遠入望淮水還澄清使君入城郭竹馬爭相迎  
念昔龍飛地人文秀而明催科政仍拙報答攄忠誠

送尹正言二親受封南歸得拜字

吉甫有雲仍玉堂好風裁嚴慈及高年褒封際昭代迎  
養極驩虞言旋事行邁祖席臨路岐春明擁冠蓋暑雨  
過川原涼風吹沆瀣艤舟滄江邊尋盟白鷗外玉立諸  
兒孫家慶繞膝拜

送僧歸杭州

超然薈藹堂瞰彼下天竺形勝良足誇高僧瑩如玉飛  
錫來京華捧檄言旋速歸將率緇流玉麈听夕祝翻經

飛雨花傳燈續膏馥細和道林詩白日坐巖谷

送蕭生還宜興

青年事遠遊邂逅長安道東風多落花夜雨足芳草胡  
為遽分攜使我傷懷抱一杯臨短亭雙鴻向晴昊還家  
有餘師功名須奮早課罷西疇耕遺篇細論討贈言致  
殷勤貞白永相保

送蔣生還宜興

同里君少年由來負奇氣仗劍千里行翻然動歸思炎

雲作膏雨涼颼颼然至潞水一帆輕黃鵠飛天際桑梓  
及鄉園箕裘念家世三徑勿投間功名須自勵

送琛上人歸宜興之福源

陽羨昔相見雨花吹滿臺都城復邂逅坐使塵襟開捧  
檄即歸去叙別仍徘徊雲中振金策水上浮木杯白日  
洒甘雨青山響法雷松枝若寄我絕勝江南梅

題買臣負薪圖

憶昔會稽守負薪行讀書穿林經莽蒼度嶺復縈紆至

道心應味清貧日自劬一朝官五馬光彩溢門閭向來  
肉眼婦慙愧徒嗟噓丈夫當立志富貴在斯須

子陵釣魚圖

羊裘足自蔽奚以玄纁為富貴重五鼎輕若一釣絲假  
令棄名節憑誰戒澆漓客星九天表獨有太史知一片  
桐江石萬古無推移

澹樂軒為孫都閫題

至澹古所尚至樂人罕同何如貴戚里却有顏巷風一

尊注玄酒五絃調素桐俯仰兩無愧坐覺塵慮空余懷  
企古澹此道嗟未充願言分所樂一笑看冥鴻

一愚卷

人皆趨敏慧世路方紛紜勞形已堪惜况復斲其真百  
為亦徒爾一愚良足珍默默鄙群夸蚩蚩同衆民心君  
苟無累萬物皆陽春所以顏氏子陋巷能安貧予方厭  
機巧何年歸卜隣

題胡方伯雙玉圖



薇垣退食處移植猗猗竹春雨雙龍孫穿破階苔綠南  
薰穉自踈翠色秀可掬造化良所鍾因之比雙玉美哉  
諸孫子讀書志科目頭角當嶸崢雲霄須奮逐雙玉信  
有徵厥德庶以續勁直君子心歲寒宜自勗清時兩鳳  
凰和鳴向朝旭

新淦蕭氏恒德堂

蕭君妙醫術恒德克自持風雲有變態日月無停馳回  
視金川水浩浩常東之承羞固足恥歷久良弗隳種杏

日接踵易粟頻資饑活人以萬計千載高名垂

南軒聽琴

南軒地云僻遁叟心亦閒游心太古上寄興絲桐間知音渺何處流水復高山黃鶴或相和白雲自飛還塞予無郢曲聞此徒厚顏

贈陰陽訓術吳璉

羲和古歷學之子紹家傳仰視日星象胸中具周天一朝膺鶚薦簪紱成蟬聯晝行耀閭里平秩歸才賢功名

此發軔及時須勉旃

百牛圖

我觀百牛圖天機妙無迹豐草翳長林羣然縱遊適  
畫史豈無意徒爾呈水墨牛於家畜中勞逸相十百尚論  
益物功當與坤元匹盡瘁向阡陌粒我蒸民食引重服  
上箱百用勞其力力盡誰復矜庖及方俟隙骨角亦異  
處待之何太刻不見青史上往覽存歷歷胥忠伏屬鏤  
信傑就鍾室施報乃如此目之三歎息

愚樂菴為傅編修乃尊題

惟愚心自樂巧詐徒自勞居然山澤間遠謝世俗交鳴  
琴既無譜酌酒亦用匏冲襟付寥廓萬事無復清白駒  
在空谷冥鴻逸青霄再歌愚樂詩令人思有巢

題邾城二蘇墓為眉山吳方伯重修賦

悠悠邾城隅繚繞惟長路路旁土巍然云是兩蘇墓兩  
蘇生眉山崛起真寡助遙從泉翁來瑞鳳莫敢附文章  
歷曾王光燄追李杜才高衆口讒屢斥同黨錮流落天

之涯氣節窮益固何況友愛情死塋亦相顧惜哉今何  
存宿草但零露上頽登樵牧旁穿走狐兔行人每經過  
感歎復悲慕到今五百年起廢良有數一朝為鳩工周  
垣更重戶種樹鬱青葱風雨泣昏暮依然彭城時飄泊  
似前度方伯今名臣好義夙所負惓惓仰止心豈為鄉  
黨故陽羨有田園曾枉長公步我生不及從夢寐若平  
素高墳無由謁拙句聊自賦

奉制文武詩

百官分職重諸曹夙夜精勤可憚勞應抱丹心酬寵遇  
肯將辛苦負青袍

其二

梗楠杞梓總良材盡是先朝雨露培今日廟廊掄大用  
棟梁榱桷一時來

其三

斷金自古貴同心要識君臣氣誼深蒙古當時猶進諫  
也須隨事託規箴

其四

百官俸祿總膏脂戒石亭前有訓辭看取漢家青白吏  
寸心惟許老天知

其五

每閱遺編慨古今股肱元首義何深共看四海無虞日  
要識虞廷警戒心

其六

覆載中存報主身廟堂須用讀書人民胞物與皆吾分

金匱要略卷一  
一視應同萬里仁

其七

四海頻年水旱多民貧如此欲如何為予持取光明燭  
不向春風照綺羅

其八

百二山河壯大邦三千貔虎盡無雙只須坐鎮邊疆靜  
不用高城築受降

其九



百年養士蓄兵威齊向元戎聽指揮  
直待邊塵清不起却銷金甲卷征衣

其十

四海無虞豈偶然也知匡輔藉才賢  
鷹揚虎拜皆臣職曾兆周家八百年

其十一

累朝勲業繼重華四海車書正一家  
好振皇威宣帝德直從賜谷到流沙

其十二

要識簪纓盡寵嘉莫將紈綺事豪華百年留取丹心在  
信是忠臣出將家

其十三

萬年宗社比金甌千里長城豈壯謀長史在廷根本固  
蠻煙瘴霧一時收

其十四

莫道兵家不是儒太公韜略勝孫吳試觀大易師貞戒

仁義從來是遠圖

內閣一首

仁義相資在格君書中一德舊曾聞經綸事業無多讓  
共策清朝不世勲

經筵

聖經賢傳豈徒言民物由來總一原講幄儒臣勞啟沃  
直從濂洛溯羲軒

公侯

剖符開國重元功  
簪組蟬聯奕世封  
莫道將門惟富貴  
一心圖報在精忠

戚里

戚里光華接帝闈  
爭看列戟擁高門  
千年共際亨嘉運  
一飯休忘富貴恩

椒房富貴有誰同  
保守多因訓戒功  
同向清時重名爵  
祇將清儉作家風

秋日朝罷二首

苑樹層層倚翠綃  
忽看桐葉向秋飄  
香浮寶鼎齋宮靜  
漸覺人間暑氣消

秋到猶如溽暑時  
夜來雨過溢龍墀  
遙憐南畝多禾稼  
載頌周家七月詩

題扇景

一曲滄浪兩葉舟  
杖藜二老足清遊  
何當借取謝家屐  
直上東山最上頭

枯木竹石為吳昉題

露葉霜柯帶晚陰  
崑崙骨冷鮮花深  
吳剛老去伶倫死  
誰識儲材造化心

題竹

蒼梧風雨送春寒  
翠輦分明夢裏看  
千古神遊應不遠  
短篷虛枕聽珊珊

題畫四景

一聲啼鳥春林曉  
轉覺草堂深更幽  
底事東風太相狎  
飛花吹滿硯池頭

看書小閣無虛日  
閣外水聲流不休  
領得無窮川上意  
此心如水澹無求

舟行多為愛明月  
況值高秋風露涼  
鼓柁滄浪歌一曲  
紅塵不到水中央

向時載酒江東去  
今日山陰載雪回  
一片閒情誰解得  
晚風溪上破疎梅

題顧永昇畫

野竹差差碧樹連  
小橋流水拂輕煙  
遲遲歸步乘明月

童子候門應未眠

題洪子經馬

逐電追風矯若龍  
千金骨相世難同  
露華吹濕黃羅帕  
行過春風便殿東

題蒲石

竹鶴老人神仙徒  
漫寫九節青青蒲  
一掬寒泉浸山骨  
小窓相對真蓬壺

紅梅



自是清寒第一花  
玉容春醉暈流霞  
羅浮迢遞三千里  
却與桃源共一家

青雲交為司馬恂如題

十年忝作青雲侶  
氣誼如公落落然  
昨夜看花出城去  
同歌伐木醉春筵

青雲交態紛如雨  
誰念山中看白雲  
歸到西齋正風雨  
一尊燈火漫論文

松竹圖

槎牙不動蒼龍角散亂無文彩鳳毛夢入三湘忽驚覺  
海門風急卷秋濤

題梅花

萬玉玲瓏琢不成坐來詩思十分清一枝記得西湖上  
獨鶴脩脩瘦影橫

題尹先之雉鴿圖

星作雙眸鐵作衣不同江燕共差池飛揚若得東風便  
須借上林春一枝

題梅贈潘栗夫僉事

玉節新恩出建章  
臺臣心事有冰霜  
百花潭上春消息  
都屬詩家錦繡囊

題扇

閒向江頭倚木蘭  
西風回首鴈聲寒  
不知浮世奔馳者  
滾滾紅塵沒馬鞍

題牡丹

瓊樓高起彩雲端  
愁絕東風十二闌  
眼底看春春欲暮

玉人消息鳳笙寒

茅亭撫琴圖

樹底茅亭十尺寬  
苔花秋雨翠生寒  
風塵不是鍾郎耳  
只恐焦桐空自彈

題鷺

杜若花香水滿洲  
柳風輕颺頂絲柔  
從來懶逐鷓鴣侶  
萬里滄江狎野鷗

寄芮惟詹乃翁

山亭山色帶青霞  
門掩松風處士家  
誰道鸞書降空谷  
白頭猶得帶烏紗

題夏太常滿林風雨圖二首

太常胸次三湘濶  
一灑滿林風雨聲  
移向鴻山讀書處  
頓令炎氣變秋清

琅玕年來不入貢  
散作人間彩鳳毛  
風雨一番龍茁角  
坐看蒼翠拂雲霄

題雪景

雪滿前山路欲迷誰傳春信到南枝想應兀坐幽窓下  
正是新詩得句時

題望雲思親圖

英英白雲在天際一度看來一惘然膝下綵衣何日着  
明朝花甲又經年

望雲不得隨雲去黃鵠南飛萬里秋只尺太行山在目  
此心千古共悠悠

紅梅

玉人被酒歸來晚帶得春霞滿臉紅幾度冷風吹不醒  
羅浮却與武陵同

題東坡竹為司馬恂

神采分明赤壁仙高堂六月起風煙一時揮灑傳千古  
占斷湘川與渭川

雪坡為李侍郎題

不須授簡賦梁園六出飛飛獨掩門滿地梨雲春有夢  
一庭梅月夜無痕絕憐曙色侵書幌更耐寒光入酒尊

白戰吟壇高興在繼聲今見有賢孫

思親堂為王子與題

結駟懷金未足憐  
哀哀長廢蓼莪篇  
清時有祿榮三釜  
白日無光到九泉  
宿草暝含寒食雨  
慈烏哀咽暮雲天  
沈瀾不盡東流水  
紅濕征袍已十年

五榮堂為張氏兄弟進士題

蓬萊咫尺五雲間  
取次臚傳玉筍班  
黃蓋曉張迎榜出  
瑣林春宴插花還  
塵香官道催遊騎  
日暖宮袍映醉顏



更喜雙親同此慶朝回舞綵祝南山

梅堂為長垣劉大尹題

種得江南幾樹花草堂相對閱年華  
芳香恍訝羅浮境清白真成處士家  
湖影照來春有信雪痕消盡玉無瑕  
調羹事業君收取從此花魁不浪誇

雲山歸隱為彭僉憲題

緋袍白簡肅臺端纔及中年即掛冠  
芳徑落英香細細小山叢桂影團團  
尋常別墅開尊易多少前途稅駕難

羸得風流如九老雲林堪作畫圖看

竹梧書舍為蔣仲學題

玉山令尹朝天日時復要予賦竹梧出屋書聲思舊隱  
滿堂秋色見新圖青苔迸出蒼龍角丹穴飛來彩鳳雛  
半點塵埃藏不得凜然清氣溢冰壺

渴湖書屋為王士瞻題

何處深藏萬卷書渴湖南畔有精廬侵階細雨生芳草  
滿架清風落蠹魚此日彈冠兼吏隱他時載酒雜樵漁

乘閒欲訪王猷宅不待山陰夜雪餘

梅月軒

山園雪後見疎梅又喜遙空夜月來  
大地陽和從此洩  
廣寒宮殿為誰開  
光搖玉樹臨書幌  
香浸金波落酒杯  
早使姮娥識清致  
當年老桂不須栽

春熙樓

畫闌十二擁芳菲  
別駕承恩畫錦歸  
座裏青春花欲語  
簷前白日燕爭飛  
聽殘瑤瑟金尊滿  
讀罷黃庭寶篆微

高卧不知天地老此心應與世相違

松軒為任廷芝題

幽人結屋青山下種得長松三百餘  
啟蟄蒼龍上霄漢引雛白鶴到階除  
四簷雲氣長垂幕一榻秋聲可讀書  
我亦平生羨弘景買山何日與同居

耕樂

識破人間蕉鹿夢歸來田舍學為農  
也知郊外好牧犢未必山中無卧龍  
土鼓郊風歌調古瓦盆社日酒香濃

青山白水年年在牧豎樵童處處逢

藥圃餘香

誰開藥圃青山下元是神醫此托棲  
赤茯苓來如斗大  
紫芝種得與雲齊  
晴窓細檢桐君譜  
夜月閑分木客題  
賸有餘香遺後嗣  
握蘭長日侍金闥

東臯草堂為王景昇題

三槐世澤深如海  
今見東臯有草堂  
舒嘯可追陶靖節  
風流還憶賀知章  
桃花春水畫船小  
秫稻秋風白酒香

我欲脫冠尋舊約故園山色對蒼蒼

賀王廷貴先生陞侍講

幾年侍從依青瑣華秩于今喜載遷科目也知惟我後  
文名誰復在君先花輒步濕春階雨芸閣吟殘午篆煙  
台鼎勲階應次第晉陵槐澤正緜緜

題吳尚書忠烈卷

翼翼穹祠枕碧山萬株喬木護禪關若教功在伊周下  
贏得名留宇宙間生氣百年渾不死高風千古信難攀

天憐忠烈多孫子  
賸有遺芬在世寰

石礪書屋

書屋亭亭石礪陰  
紅塵不到晝沉沉  
細看邵子園中理  
漫拂師襄膝上琴  
纔向靜中探月窟  
却從復後見天心  
殘書幾卷遺諸子  
絕勝滿籬都是金

內閣二瓷缸乃憲廟所賜種蓮者三年不開已  
今年盛開因賦二首紀事

誰道盆池有許寬  
荷花着雨溢清寒  
風前兩兩如相語

水面亭亭自可觀  
大世幾同黃閣賞  
化工寧費絳綃攢  
煩襟五月何由滌  
香露淋漓瀉玉盤

太液池頭一種分  
香風乍起隔簾聞  
清留葉上團團露  
紅動波間冉冉雲  
道眼濂溪曾入詠  
仙姿姑射易成醺  
年來定有如船藕  
莫問當時太乙君

次同寅劉少師韻二首

為愛西湖近太清  
玉池汲水浸瓊英  
為衣未解靈均意  
觀物元知邵子情  
開占朱明天與艷  
種當紫禁地增榮



自從春去花應少留與羣芳作主盟

日照漣漪徹底清高荷初着兩三英翻翻似欲撩人語  
脉脉誰能解物情勝事儘教留左掖芳根贏得託南榮  
何時遂我歸田願曲沼芳塘叙舊盟

疊芍藥韻詠荷

葢愛新陽葉愛陰碧池過雨水深深已從紅蕾知鮮艷  
未擘青房識苦心歲事栽培應有待物生開謝每相尋  
看花悟得無言處漫向風前作短吟

凌波仙子月中歸水面盈盈見步稀似伴紫薇同我往  
肯隨芳草傍人菲並依玉砌如相語斜逗朱闌不受圍  
開後東風渠不怨置身元在掖垣扉

詔許歸省

曉承恩詔許南旋暫輟清班下講筵新賜宮袍纔五品  
重來鄉國已三年園中斲筍晨供膳湖上看山夜放船  
記取玉堂相送意春風鳴佩早朝天

虎丘寺

閭闔門西第一峯白雲踏破幾重重聽經石在猶疑虎  
鑄劍池空亦有龍古木撐空知歲久落花繡地覺春濃  
老僧留我盤桓處隱隱東樓起暮鍾

留別虎丘簡上人

遠公一別廿年餘今據猊床喜自如香動墨花時寫偈  
影翻貝葉晝看書人間行跡如蓬轉物外禪心若鏡虛  
飛起竹邊雙白鶴談玄未已煮茶初

內閣芍藥二首呈李先生

禁城遲日曉陰陰紅藥翻階紫閣深香雨乍沾殊有態  
綵雲長護豈無心玉堂封植人何在金鼎調和事可尋  
幸遇清時多暇日退朝嘗得對花吟

名花獨自殿春歸一種人間得見稀不逐人情誇富貴  
故知天意與芳菲仙姿合種瑤臺側盛事曾徵寶帶圍  
把酒看花成舊識年年相伴任黃扉

壽鄉親蔣竹隱

三徑徜徉一老仙耆英會裏最高年翠雲涼露分詩榻

白藕香風薦酒船舉世但知金壁貴幾人能見子孫賢  
懸弧此日逢初度為賦南山介壽篇

壽胡方伯

甲子初踰十五年幔亭高會擬彭錢自憐洛社今多侶  
不信蓬壺別有天玄鶴一聲聞綠野綵衣五色繞春筵  
詩篇好配甘棠頌并與東風奏管絃

壽陸主事母八十

阿母高年白髮新北堂懸悅此生辰榮封錦敕渾忘貴

儉服荆釵不為貧海上蟠桃紅沁露堂前靈草翠含春  
賢郎望望孤雲切遙奉霞觴祝頌頻

壽錢學士外舅莊公八十

孤星光燭戴溪前野老今當八十年曾向清時膺寵命  
邇來平地作神仙綵衣舞處人如玉綺席開時酒似泉  
珍重南飛歌一曲玉堂學士意懸懸

壽溧陽楊竹泉

逍遙何異地行仙甲子今逢八十年席上金杯浮潑灩

階前綵服舞蹁跹恩波正洽重熙日壽域方躋不老天  
雲漢仙郎今顯秩南山遥祝短長篇

送九江郡判鄭廷韶

雲暖天衢雨浥塵清風雙旆遠行人舊從桂籍知名久  
今向楓宸拜命新天入九江連郡治星羅萬室擁編民  
廬山五老多形勝公暇何妨覽眺頻

煙霄鸞鶴正紛紛尊酒憐君是逸羣望入九江春欲盡  
恩沾雙闕曉初分郡中善政期參佐紙上陳言事見聞

却喜盛年才力健，好攄忠悃樹芳勲。

送李學士南歸次韻

采采黃花帶露餐，出塵風韻似君難。  
文章蚤入韓公室，詩律先登杜老壇。  
三館並遊誰少壯，百年相見幾悲歡。  
馬蹄明日燕南路，草軟沙平雪半乾。

書生不慕五侯餐，處世何憂跋涉難。  
舊學自應歸鳳掖，故交誰肯負雞壇。  
雲萍未合長懸夢，尊酒相逢且盡歡。  
愛殺蟠胸千萬卷，挑燈時見壁魚乾。



史局編摩每共餐六年相聚別何難萍蓬宦迹原無海  
金石交論故有壇話屢摘書評往事醉猶撫掌罄餘懽  
相留莫訝過深夜漏滴銅龍正未乾

送平陽章自鑒授福寧司訓

其父舊為  
吾邑司訓

荆溪鬻舍相過日三十年来一夢如久抱青氍存舊物  
忽看烏帽荷新除路通故里歸應便座列諸生樂有餘  
想到閩州依海上荔枝榕葉暗齋廬

送吳甥儼養病南歸

金匱要略卷一  
甲科名譽謁鄉閭正是詞林績學初仕路衰年方賴汝  
客窓多病却思予暫歸得侍高堂膳重到還看秘閣書  
聖代養材期大用無忘感激在閒居

送仲弟時望歸率兒輩為義田之舉

扁舟憶昨上神京知爾非徒利與名先志未忘年尚少  
義田應買議初成族同公藝雖無及制倣希文定可行  
莫惜殷勤為久計緘書早報慰深情

送沈時暘之任

三年宦邸最相親，惜此分攜乃暮春。  
扳贈可能將白璧，笑談聊爾破清塵。  
東城雙旆花香滿，南渡孤舟山色新。  
便道還家良足羨，持觴稱慶樂天真。

送尹正言父還太和

清朝有子侍彤闈，祿養如君古亦稀。  
仙液浮香供夜宴，宮羅剪翠作春衣。  
謾論人世如浮梗，還憶家山好采薇。  
萬事不干真吏隱，野鷗從此共忘機。

送齊經歷還嘉禾

東南大郡重專城  
贊畫從來屬老成  
品藻無私書上最  
及瓜有待促嚴程  
黃梅雨濕雙旌重  
紫棟風吹五兩輕  
蓮幕可容虛席久  
兒童竹馬出郊迎

送牟都憲改福建僉事

繡衣玉節下征輶  
東望甌閩萬里遙  
攬轡羨君能奉使  
鳴珂慙我舊同朝  
聲馳八郡秋霜肅  
氣壓三山瘴霧消  
當宁憂民心正切  
呻吟指日變歌謠

送莊進士養病歸金陵

買得西風白下船  
秋來乞假許南旋  
曲江韋肇登科日  
西蜀相如抱病年  
行李蕭蕭唯藥裏  
宦情落落付詩篇  
黃門烏府專相待  
早約鳴珂到日邊

送毛璿省兄南還

為念難兄寓帝京  
遠來應叙友于情  
謝家夜雨池塘夢  
歐子秋風驛路程  
江岸黃花迎客笑  
海天紅樹照帆明  
到家賸有枌榆樂  
飽聽嘉平社鼓聲

送徐士亨歸江陰

征輶早發都門道強欲留君計不成五夜芙蓉城裏夢  
一杯楊柳渡頭情他年儼踏金鰲背此日先聽彩鳳聲  
遙想解元坊下路里人無數插花迎

送夏都運之揚州

千載才名擅祝鳩官遷三品沐恩優還鄉正好懷題柱  
煮海功成不借籌東魯雪餘寒色重南淮春近曙光浮  
繁禧觀裏遙相憶折得瓊花寄我不

送丁巡檢赴任順昌

晉陵才子三公後一命還沾雨露深  
此日風光辭北闕  
平生聲價重南金  
故園春滿桃花塢  
官道雲連荔子林  
清世不勞神射力  
公餘柱笏足高吟

送年兄高茂卿侍御督戎政西川

看花曾共曲江遊  
憲府才華羨獨優  
久肅霜威裁豸角  
新承天語下螭頭  
香分殘菊都門酒  
影動征帆潞水舟  
兵政有成來獻績  
經綸事業屬嘉謀

送崔元吉

昨承簡命下鑾坡握手其如惜別何官況在君誇特達  
年光於我感蹉跎邯山過雨羅青嶂洛水無風漫碧波  
好寄音書慰相憶郡中星使每經過

送鄒廷佩知高安

雄才雅望拜郎官自信清時際會難曉日鳴珂辭北闕  
秋風驅騎入高安政聲喜共絃歌作惠澤能令士庶懽  
千里筠陽重回首一緘顒望托飛翰

送李至德侍御



南臺驄馬赴神京黃閣難兄慰別情聳壑蒼松堅晚節  
連城白壁擅時名盍簪旅邸啼鶯好分袂郵亭過雨清  
此去相期勲業重他年曳履侍承明

送孔宗魯還鄧

才華落落共稱賢闕里衣冠奕世傳明日馳心千里外  
何時聚首五雲邊停鞭謾酌青尊酒看劍重歌白雪篇  
相府平安遙致問秋風旅鴈正翩翩

送同年趙廷縉

昔年鄉榜喜聯名  
佐郡功高沐寵榮  
奕葉詩書承世澤  
清風琴鶴振家聲  
西川倚棹吟邊景  
南陌看花別後情  
他日春風有歸鴈  
肯修尺素寄神京

送錫山邵二尹還任

清時曾應賢良舉  
藉藉鄉邦令譽馳  
白晝哦松知散逸  
紅亭折柳惜分攜  
新秋驛路蛩吟早  
斜日江汀鴈落遲  
要秉清勤慰民望  
遷書指日下彤墀

送張中翰使朝鮮

駢駢四牡都門外一望東隅路不遙  
聖澤汪洋被清海使星燦爛麗丹霄  
岸晴楊柳如雲染山晚桃花帶雨飄  
王事有成先入奏承恩御席聽簫韶

送劉君傳扶兄櫬南還

南風自滴薔薇露試向離筵一賦詩  
望斷蘼蕪天際色折殘楊柳道旁枝  
半年共訝言旋早千里休教問訊遲  
獨有西堂春草夢鵲鵲飛處不勝悲

送周廷瑜

兩旬聚首長安館席暖驚聞話別何白雪有歌殊慷慨  
青雲得路莫蹉跎雨餘槐市炎光淨秋入蘭陵爽氣多  
最喜嚴慈尤矍鑠白頭林下沐恩波

送王民望擢河南少叅

早年青瑣擅才名薇省叅知政不輕長劍倚天酬壯志  
踈鍾落月動離情夷門山色吟邊見洛社秋光馬首迎  
應與三槐縣世澤聯班鴈鷺位三卿

送重慶聶震指揮

英武堂堂正妙齡笑分銅虎出神京旌旂影動巴江道  
笳鼓聲喧蜀將城樓櫓春晴花氣重儲胥夜靜月華明  
方今選將湏才傑好展胸中百萬兵

送陳永明歸宜興

浩蕩風光二月中可堪歸思更匆匆不辭古道折楊柳  
應念小山團桂叢司馬壯遊千里別元龍豪氣幾人同  
故園親舊如相問老我黃扉兩鬢蓬

送濮用明教諭

炎風吹木急如號把酒送君心更勞客路定從今日遠  
詩壇不比舊時高月明古戍聞孤角水淺長河積萬篙  
明入講堂垂化雨杏花春色映宮袍

送周堯佐赴南京

連日南風吹火雲郵亭對酒惜分羣十年玉署膺天寵  
兩地青藜照夜分鷺渚平蕪煙冉冉龍潭流水晚云云  
知君著述多高興不比中郎但鬻文

送王維臣歸省

少年科第玉堂仙特許歸寧寵渥偏名譽儘誇同白壁  
文章爭羨似青錢鳳從上國卹丹詔人在西湖候畫船  
壽酒一尊稱慶處三槐堂上日如年

送江東之歸省

秋日都門楊柳稀離杯纔罷儼駸駸太沖作賦三都重  
司馬題橋萬里歸下峽濤聲隨處有連雲樹色望中微  
玉堂金馬論思地早約揮毫向瑣闈

送彭彥實兄還安成

冠蓋如雲把別觴  
都城東畔送元方  
征鴻嚶嚶聞青海  
禁漏遲遲想玉堂  
列嶂絕憐秋似画  
好詩應費錦為囊  
鄉園故舊歡相賀  
棠棣聯芳化日長

送危教諭之桐鄉

寒韞元不較勲階  
吾道東南育俊才  
晏歲關河勞跋涉  
春風桃李費栽培  
五經洞徹文光燭  
萬騎縱橫筆陣開  
最是諸生承教益  
短亭衰柳惜餘杯

送張員外父南還



萬事休論塞上翁  
南還高興逐飛鴻  
凌雲貞柏千秋雪  
委地飛花一夕風  
行色不嫌歸路遠  
詩壇應許故人同  
天曹祿養恩無極  
五色封章出禁中

送王民望使占城

爐煙裊裊蓬萊殿  
天漢澄澄博士槎  
玉節倚雲承使命  
金函綯日出皇家  
成周禮樂儀文備  
異域山川景物賒  
從此恩光垂草木  
早歸輦轂候宣麻

送李少卿還南京

列爵容臺擅老成  
紫芝眉宇玉壺清  
熟司三禮追先哲  
細講羣書啟後生  
鳴佩朝天書上最  
揚旌出郭戒歸程  
金陵山水春如錦  
多少衣冠一笑迎

送尹先之還寧波

春來半月尚微寒  
話別匆匆不盡歡  
舞劍君能歌激烈  
緘書我欲問平安  
渡江白鳥舟邊見  
出郭青山馬上看  
莫道幕中無一事  
匡時好竭寸心丹

驄馬行春為尹仁侍御題

陰霾歛盡天宇清當春處處聞流鶯烏臺小隊出郊野  
宛轉驄馬花間行道上行人行且止還避當年桓御史  
都城九陌淨塵埃上苑千門滿桃李豸冠象簡生光輝  
繡衣鐵面霜亂飛觀風問俗徧巡歷日暮攬轡依然歸  
歸來衮職將何補入侍仙班屹如堵為采歌謠草諫書  
鞠躬盡瘁獻明主豺狼屏跡狡兔藏奸邪膽落民物康  
坐令四海日熙皞東風擎壤歌虞唐

題雲山圖

山隆隆兮雲溶溶人家向西水流東門前喬木晝啼鳥  
江上大魚春化龍主人閉門展書讀不知雨漬階苔綠  
興來欲覓子猷船訪戴山陰剡溪曲

大塘漁樂為韓司訓大父題

水雲之鄉遠城郭遨遊長是漁家樂天青月白一境平  
大塘那有風波惡世間大釣本不釣直鉤引得旁人笑  
由來在樂不在魚粒餌六鰲豈同調菰米垂雲秋釀熟  
醉來幾度西岩宿客星共解照桐江兩足何曾加帝腹

雲鶴軒為韓司訓先翁題

雲兮不作太山雨  
鶴兮不乘衛懿軒  
山間林下自蕭散  
幽人為侶居田園  
薄暮雲栖屋頭樹  
鶴立空庭不飛去  
雲兮鶴兮兩相忘  
習靜何曾離隱處  
一朝跨鶴凌白雲  
軒居閒靜聲無聞  
仰瞻霄漢望不及  
令人惆悵對夕曛

題秋塘野鷺圖

晉人愛書學野鷺  
庾家諸郎真不俗  
迢迢青晝圖畫開  
此鳥依然在人目  
良工手握五色毫  
寫出江南秋一幅

羽毛絢日殊分明蜀錦新裁仍細簇荷花似避顏色鮮  
搖落紅衣動盈掬將身不入樊籠中長年占斷澄江曲  
雖然水面只卑飛遠志冲霄比鴻鵠弋人慎勿張虞機  
任渠自下清波浴

題過廷章聽秋卷

過君兩上黃金臺車輪馬足奔如雷亦有笙歌沸日夜  
笑語各出爭喧豗胡為作此聽秋軸上有蕭蕭萬竿竹  
化機不露斧鑿痕虛籟半雜鈞天曲過君聽此不聽彼

城市山林信斯語靈臺湛湛涵清秋直與此君作賓主  
乃知心靜聽亦靜羣物紛紛由我定人間無處無秋聲  
我亦從之靜中聽

瓊林醉歸圖為李大濟題

杏花紅映宮壺酒藍袍盡是同年友不辭一醉向東風  
感荷恩榮世稀有歸路煙塵飛夕陽須臾海月生明光  
馬上倩扶玉山倒此身遭遇當虞唐君今作宰聲藉藉  
展取新圖尋舊跡為憶聯鑣紫陌春笑把霜毫揮醉墨

江湖取友為顧景德題

平生雅愛江湖遊金蘭之契皆同流  
道逢傾盖即如故  
詩歌伐木堪相求  
江波濯纓清可掬  
湖上乘舟頻往復  
何年許我社中來  
處處鷗盟慰幽獨

滄洲圖為王慥郡守題

人謂滄洲不可即我尋滄洲來咫尺  
黃堂太守住滄洲  
指示丹青得真跡  
持將半幅入京師  
一片寒雲墮瑤席  
春風吹花花欲然  
夜雨漲溪溪更碧  
扣船渡口問漁郎



沽酒山中醉木客萬卷書藏鄴侯家一區地儼楊子宅  
紫芝赤箭滿地生甘泉香霧和雲滴沙隄日暮踏殘紅  
石室月明坐虛白回觀宦海何渺漫每念蒼生思排卹  
陸渾迢遞輞川荒眷此滄洲竟成癖

題畫贈崔元吉

何侯丘壑填胸臆醉來潑盡金壺汁江南一片好風光  
遠淡近濃天只尺木蘭舟小煖浪輕草亭春盡啼流鶯  
人生行樂漫何事明日落花風雨聲老懷儘有傷春意

載酒登臨忘歸去對畫題詩正送君都城聚首知何歲  
忠節為王信都督題

聖王宵旰理天下首以忠節敦風化九重有詔錫褒嘉  
便覺家聲美無價憶昔王侯決戰時氣劇賊壘懸孤危  
英雄一踏天所惜草頭冤血青離離二九孀居婦年少  
貞松勁柏同一操保孤全節老閨門茹蘗吞冰秉純孝  
孤成樹立效奇勛手持哀疏干天閭會看恩波活朽骨  
大書金字旌高門多少偷生背恩義此日過之應潁洙

惟有網常萬古名世上繁華暫時事

紅梅花

梅花本白今乃紅造化變幻何其工為嫌鉛粉妬清絕  
臙脂抹額肌骨融東風樹頭春拍拍別是江南一標格  
冶容未必苟隨時自有心腸同鐵石我家住近西子湖  
舊與此君相友于漁村煙月僧堂雪至今詩句懷林逋  
別來廿載金臺下往往人家見圖畫遮莫相逢面發頰  
愧我素衣今已化此日南宮靜不諠高情脉脉兩無言

金匱山經  
卷一  
王壺新賜金莖露醉愛一庭春色繁

穀沼承祥為方伯題

十畝方塘甲第前廬江潁水遙相連乾坤佳氣孕靈秀  
散作五彩涵清漣紋成綺縠光如潑氣奪虹霓碧天濶  
豈無老蚌吐明珠還有神蛟起流沫迢迢銀漢有通津  
雲舒霞斂玻璃新天然至乃孰雕飾俯首試問馮夷神  
神云此瑞世無匹三百年来凡兩出衣冠疇昔在宣和  
先後青雲總超軼只今蘭玉盛昆孫朱輪皂蓋盈高門

柏臺況有埋輪客分符大藩蒙殊恩文明有象信非偶  
地靈人傑誇江右從茲閤閣倍光華奕世書香傳不朽

題桃花斑猫二首

碧桃花下春風暖綠草鋪茵芳徑軟烏員引兒羣狎遊  
深院無人恣消遣蹲窺仰瞰或俯臨縱橫上下相追尋  
曉日床頭殊可愛溪魚豈惜囊中金此種從來豈易得  
彪炳文章絢奇色銜蟬搏鼠何足論遺類應知自殊域  
畫工手妙不可當模逼造化真行藏披圖展玩漫題品

滿庭生意呈休祥

東風暖入藏春塢狸奴引羣三復五花容旖旎披氎毛  
草木蒙茸襯香土熒熒眼光一線微綠樹陰中日亭午  
徜徉仰俯真自適曳尾摩鬚或交股腥膻誰問食無魚  
捕逐寧知田有鼠朋儕親狎少忤觸子母追隨爭哺乳  
生生物性皆天然甄陶喜見陽和普

五老圖

羣黎欣欣生喜色四野于今開壽域老人並立望天門

白首一生蒙帝德試問老人年幾何今見文孫至太和  
凌雲昨過蓬萊頂仙酒頻斟俱酩酊歸來金母復相邀  
熟徧蟠桃只俄頃天書共領到人間鶴馭初臨萬歲顏  
嵩呼敬祝聖人壽壽比天地高難攀我聞人云漢四皓  
又聞人云唐九老較之商山差若多視彼香山却為少  
按圖不必論異同圖中見面如相逢廬山西東白雲裏  
一笑分明五老峯

含清樓

并序

吾性好樓居常欲構一樓以便登眺未暇也  
弘治丙辰吾子元相聞予歸興已切將求解  
任乃能先意成志預於後院擇隙地一區建  
樓五楹前為重門以避俗後為方池以種蓮  
規制宏遠可愛越三年吾年已七十上章求  
退上不許又明年目疾偶作而吾不能出連  
上三章懇切求退上乃許之恩禮優厚何能  
報稱於萬一也及抵家樓已成矣暇日試登



覽之乃見四面山水環繞意思豁然吾目不覺為之開朗因取謝靈運山水含清輝之句題其扁曰含清是誠一勝概也爰賦長句以識其事云

陽山何逶迤銅山何巉巖  
溪隨山知幾灣我樓正在  
溪山間樓上四面皆青山  
溪流抱樓隱若環當時山水  
皆舊識久戀君恩歸未得  
山風溪月夢悠悠十載相望  
勞我憶一朝許歸蒙詔旨  
未見溪山已先喜竭來樓上

何所為仰觀山俯觀水水泱泱以向我山靡靡以相迎  
我一見之眼為明松巖竹徑互窈窕鶴洲鳬渚重迴縈  
朝披雲霧自拄笏夜弄星河時濯纓黃扉紫閣縱然貴  
故園山水能無情吾聞李白賦天姥又聞朱子誇武夷  
南中山水如此稀嗟我欲往力不隨何如此山此水含  
清輝樓中伴我娛我日暮長忘歸

壽親堂為莫宗範題

靈椿八千長不老東風萱草花開早熒熒南極夜流輝

自喜雙親俱壽考春雲裁就五色衣時時戲舞供甘肥  
顙將長繩繫白日笑看滄海紅塵飛

送李應禎下第南歸得慎字

赤驥昂昂凌八駿彩鳳翩翩下千仞日華五色炫文場  
銳氣三軍臨筆陣且逐行歌杜少陵寧辭伴食盧懷慎  
明年三月桃花紅繞殿春雷一聲震

送和二尹還任宜興

吾邦少尹真瓌奇連艘千里來京師決旬了却公家事

南薰五兩催行期一杯餞別長安道吏民懸望歸來早  
哦松正爾及清秋觸處炎歊淨如掃

送徐上舍南歸

綠槐官道蟬聲咽故人相逢又相別橋門風雨未經旬  
便道歸裝向明發舊書可讀劍可看五色雲錦胸中蟠  
人生際會良有在會排閭闔呈琅玕

送楊司諫之南京

同雲漫漫未成雪故人握手都門別馬蹄蹴裂沙河冰

鴈聲叫落淮陰月關西自古清白聲甲科早掇超羣英  
手持風裁下南國諫草日日来承明

送蔣日章考最入廣信

吾鄉作郡如君少別駕三年馳譽早却來報政上銓曹  
善最端能出塵表平生道同心亦同近年京國長相逢  
匆匆行李又言別一曲驪駒意萬重更道從容經故里  
七月天風涼似水雙旌遙指玉山高民吏懸懸應久矣

輓劉文羽醫官

夙承三世業醫國更醫人一七曾投我千金未報君淒涼蒿里夕零落杏林春旅櫬南歸日長揮淚若沄

輓李翰林

文章惟典雅行輩總相推聖主虛心日詞臣際會時詩中麟趾見池上鳳毛遺大器方垂用良材竟不支縉紳爭惋惜閭巷亦傷悲淵大才非短商哀理固宜靈車遵故道瑩樹長新枝不盡臨風意含悲賦些詞

輓同年方進士

秋闈飛步冠羣英擢秀南宮羨老成貫月乘槎經蜀道  
看花連轡向都城泥金欲報先成計薤露重歌最慘情  
難弟啣哀扶旅櫬西風白鴈送丹旌

輓同年趙克周乃祖

丰度脩然作隱淪玉峯南畔樂天真吟詩厭見催租吏  
賣藥頻逢種杏人天下鶴書丹闕曉人間蝶夢漆園春  
諸孫今已登華要忍見當年手澤新

輓竹深章處士

一夕悲風動會稽蘭亭遺跡轉淒迷定從天上騎黃鶴  
浪說人間夢白雞棋局無聲脩竹塢屐痕有印落花泥  
當時積德知多少月旦何慙重品題

輓萬尚書祺


風露蕭蕭易水旁官居行部忽云亡夢魂長繞黃金闕  
歸興空懷綠野堂八座功名雲路迥兩朝恩眷海波長  
歸來伉儷應同穴雙壁泉臺耿夜光

時長孫煥從其父來省子愛其資美而恐怠於



學也因其還賦此訓之

愛爾年方少為人好向前長教從質朴慎勿效輕儇待  
賈開書匱勤耕守硯田早將科第繼吾老已華顛



謙齋文錄卷一